

四庫全書

集部

欽定四庫全書

十五家詞卷三十三

休寧孫默編

陳維崧烏絲詞二

中調

臨江仙

偶作

憶在冶城公膝下圍棋年少知名石頭兒女本輕盈象
牀春縱博珠衿夜彈箏倏忽過江門第換中原飛渡

羣僉吳霜點鬢不勝情案頭無鬼論肘後淨名經

酬贈崇川陶月嶠

四十男兒方墜地家聲列戟風流翩翩挾彈少年游兄
居長樂尉主尚富平侯詎料蹉跎空老大逢君楚尾
吳頭酒闌話向北風愁無家徐僕射有淚白江州

蝶戀花

紀艷

避人

劉氏三娘雙姊妹生小繁華家住鷄鳴埭梵字闌干花

影碎妝樓恰與春波對
雨小後堂曾博簏阿母簾前
此日教重會傳語翹風空至再蟬釵只靠秋千背

前題

促坐

簾內桐花間弄影不便相辭悄語傳聲請猶自眉峯烟
不定避人奩內添宮餅
說道今宵天色冷且自留停
莫撼鴝兒醒珠斗欄斑斜又整人間第一消魂景

前題

闌葉
闌葉子
戲俗名馬弔角

犀蒜銀釘紅玉榻小小簾櫳不與金堂接
闌草又慵彈

阮怯邀郎今夜拋金葉 百子 枝花香粉浥郎是椿家

好把豪犀厭

音葉

小負紅潮生兩頰 給郎博進惟榆英

百子

枝花俱葉子名闕葉
有椿須用一物厭之

前題

跳索

其戲兩人轉綠繩於砌下便捷如
飛一人距躍於白光中吳俗謂之跳百索

涼夜金街天似洗 打疊銀篝薰透吳綾被 作劇消愁何
計是 鬢絲扶定相思子 對漾紅繩低復起 明月光中
亂捲瀟湘水 匿笑佳人聲不止 檀奴小絆花陰裏

前題

聽歌

梔子簾前斟鵲腦隔著屏山愛聽銀養好唱盡紅鹽人
不曉依稀記是蕭郎稿偷得新聲三兩調悄學春鶯
唇綻櫻桃小銀蒜輕搖郎到了和羞吹滅蘭釭早

前題

迷藏

亞字闌干花一朶每到花朝春夢偏難妥女伴相攜爭
婀娜迷藏小捉粧樓左鬢棗微鬆蟬翼鞦怕有人窺
輕合黃金鎖戲罷偎人苔砌坐日移交網花陰簸

前題

圓壺

拂曉相逢花弄口如此天寒何事清晨走小院綠熊鋪
褥厚玉梅花下交三九招入繡屏閒寫久斜送橫波
郎莫衣單否袖裏任郎沾寶獸雕龍手壓描鸞手

前題 教簫

一帶紅牆剛六幅忽聽簫聲欲斷還將續知是東隣吹
鳳竹邀來教弄相思曲風起落花紅荻荻香唾猩絨
小印琅玕束故說玉人吹未熟明朝重到黃金屋

前題 中酒

年少雙文能勸酒笑折花枝今夜為郎壽紅燭厭厭籠
翠鈕飲深忘却春宵久若下烏程春釀厚却笑佳人
腰似三眠柳明日綠紗窗外走手搖屈戌妝成否

前題

滿院姊歸啼惻惻隔著中門悵望游絲織訊至方知娘
小極潛來小揭蜻蜓翼怕響金梯行不得半晌徘徊
纔到菱花側立久微聞輕歎息春陰簾外天如墨

春閨同周文夏賦

芳草萋萋人脉脉綠遍東西不空南和北滿院春晴無
氣力海棠花下捱時刻惆悵去年逢玉勒酒市紅橋
此際曾相識往事不堪重憶得錫簫陣陣催寒食

唐多令

春愁

蟬髻隔花陰香肌壓翠衾風前一笑擲千金記得那時
明月底剛半線露丹襟銀鑰香沉沉朱樓阻信音流
鶯啼破綠窗深清淚未彈紅淚滴流不了到如今

廣陵上巳

板渚柳枝橫津樓酒旆輕舊繁華猶記蕪城正是濃春
逢上已多少事麗人行年少愛風情紅粧識姓名杜
紫微此地曾經今日鬢絲真老大和燕子語平生

攤破醜奴兒

紀艷

隔簾接碎相思莖斜著烏雲漾著紅巾嫋嫋亭亭一段
春是耶難道是昨宵人戟門闔却歲蕤鎖花氣氤氲

月色繽紛牆角獨兒吠夜分非耶誰道是昨宵人

漁家傲

宣城道上

古木叢祠山逕細野花斑竹粘天際蕭瑟崢嶸誰可擬
墟烟起家家水驛門斜閉三秋搖落悲游子一鞭自
裊西風裏歇馬溪橋人乍倚樵夫指麻姑大好朝來髻

宣城有
麻姑山

聞西樵方為京口三山之游却寄

晴日南徐風景異蒲帆飽趁春濤駛一片江山千古事
同兒戲伯符志業何曾遂月下租船人咏史使君大
有凌雲氣滿目茫茫愁對此橫笛裏妙高臺上吹新水
定風波

懷潁川劉公猷記與茂之公猷小飲紅橋幾歷
一年矣故有此作

昨歲行歌古竹西廣陵三月柳綿飛誰更扶筇郊外走
林叟開元遺事說依稀時序飈流驚又換春半風光

雖似舊游非綠到江南清潁尾春水潺湲好為寄相思
醉春風

艷情

月暗蘭缸冥風細花陰冷紫茸帳底拍蕭娘醒醒良
夜難逢幽歡可惜休教酩酊活火初烹茗寶篆猶生
鼎紅蕤枕畔語檀郎等々城上人行籠中鳥喚如何
便肯

青玉案

咏糟蜆

春醒未析三更後
橙片切莼絲
糲食品厨娘
偏解鬪滑
應凝盃鬆難勝
齒幾辦媽紅透
金刀小向霜天剖
越
襯出春纖消瘦
捧處紅糟先欲溜
小姬無語老饕餐
狂叫
把與梅同嗅

咏油車螯

擊鮮海錯金盤瀉
絕稱是春寒夜
輕點吳酸魂已化
和
酥為滴帶脂成釀
二月花前榨
生平斫鱸兼行炙
枉

行遍屠門蟹舍風味似伊休論價差宜下酒雅堪鬪茗
携向江南詫

咏醉白蝦

半籠春水溶如鏡早頃向金盤淨一片空明嬌掩映霜
鬢半呬雪肌半挺似帶春醒病尋常蝦菜空相競誰
解得高陽心性細憶風姿心自省十分酒氣三分生氣
羞與侯鯖並

隔浦蓮近拍

飲小三吾亭前古梅下

今朝穠春天氣袷服為佳耳人在梅根冶暗香疎影迢
遞殘內紅生杯中綠汎小吸宜城蟻消魂死 那人蛾
綠料應玉貌如此難憑春驛折寄一枝千里橫笛誰吹
東風起生怕玉鱗飛著春水

風入松

第二體

上巳後二日洗鉢池汎舟即事同亦史山濤賦
蜻蛉小泊斷橋東人在櫓聲中水面殘霞飛不定春波

靜暝翠玲瓏夾岸細挑斑竹半船淡月微風
紗窗盡
摘簾紋融心事暗惺忪小拂絲楊人語細春衫碧恰似
新桐可惜小浯溪上明朝更與誰同

時阿雲將
小別數日

祝英臺近

咏橘

水濛濛烟嫋嫋紅遍江南樹小陸懷中數顆偏憐汝笑
他梅子心酸蓮兒心苦都讓爾甘芳如許
增悽楚記
得解橘春纖指冷偎人處一別吳娘往事渾無據自從

那日傳柑幾番元夜總則是淚珠如雨

送入我門來

寄書

香茗才情簪花模樣斜舒蜜色牋兒霜毫纔吮早已淚
如絲楚天樓上湘娥倚奈湘雨湘烟十二時說與天
涯游子近日懨懨春病生怕難支為趁雙魚無物寄相
思珍珠滴向紅綃滿怕綃滑珠圓難寄伊

紅林擒近

咏佛手柑

芳樹來甌越名同吳下柑
風調輶橙橘芳華擅閨襜
玉人夜涼酒醒怪底薰透紅衫
此際寶鴨休添香氣十分
霑
月底偏濯濯枕畔故摻摻
佳人笑說雪山花辦曾
拈自塵情未斷佛猶如此合掌長思伴玉纖

驀山溪

感舊

碧雲薄暮畫角誰家奏
深院火熒熒好風輕翠幃微縐

冰輪徐上無語掩屏山金鉤瘦鰲綃透人在銀燈後
年時小苑良夜曾攜手低掃淡黃蛾漫垂垂玉人紅袖
如今人去門巷也依然紅橋口香街右一帶青青柳

天穿節次葛魯卿韻

宋以正月廿三為天穿節
相傳女媧氏以是日補天

曉寒側側繡戶涼如水燈市火初收不十日春喧北里
都城士女結隊踏天穿珠絡鼓畫樓旗漾在東風裏
江南詞客生長烟花地可惜是穠春最難忘夢華遺事
倚闌悵悵暗裏憶當年新雨後板橋西那處人家醉

蕙蘭芳引

咏木瓜花

綠水人家有一樹垂垂紅雪瘦影亞雕闌啼盡春禽百
舌玉娥睡醒問何處麝蘭偷泄恰侍兒報道枝上名花
纔結記得良人曾經漬粉去秋時節歎雖有好看不
比比香清絕那知花朵一般芳冽愛清芬莫對傍人輕

說

古詩云良人
為漬木瓜粉

洗鉢池中有贈

客裏無憀瞥見處繡簾斜軸恰暮雨瀟瀟低唱傷心人
曲相逢却扇板橋西數枝春竹正籠中鸚鵡叫醒一窩
紅玉 攜上吳裝一聲欸乃碧天如沐愛香藕花輕偏
打向船窗簌簌嬌歌妙舞明眸曼睂記昨宵水色半城
都綠

早梅芳近

咏玉蝶梅

整偏佳斜更好風格那能到粉牋欲賦除是多才李清

照亭亭情意厚
嫋嫋腰肢小
正入春陰重
白處粧樓曉
夢無憑
愁不了
從古江南道
天寒日暮此意惟花堪
共表文犀慵再掠
金鴨羞輕抱
撚梅花今年驛使杳

簇水

春雪

有影無聲小樓一夜堆瓊
稷撒鹽絮舞遍天涯六出
最愛輕鬆纖軟雅稱紅閨
客遮不住空青簾翼
春陰積怪此際曉寒何重
圍紅獸偎窗隙樓前莫管
一任騰

騰瑟瑟且淪鮑家香茗雪水傾來白紅日照消入一池
深碧

步月

本意

小市門東板橋巷北暗中瞥見芳姿明眸膩臉夜靜漾
簾衣碧柳映幾層衫子紅蕖露一綉鞋兒斜靠著江梅
一樹剛得半開時 銅駝街又敞奈珠屏似水此恨誰
知弄春纖香橙代解迴秋水羅帕親攜歸去也一鉤春

月水仙祠

魚遊春水

春陰閨思

盡日香閨悄纔縵額東風料峭可惜紅芳如此匆匆過
了做暝遙天渾似墨粧陰野水愁難曉獨對菱花橫波
淼淼更惆悵誰知道漫消受綠篝烟裊何日剪破層
陰依然春好料得藁砧愁遠泊也無燈火來相照怪底
今宵黃昏偏早

宣清

春夜聞雁

春夜紅蕤枕怪賓鴻月底哀鳴如昨
菴青衫淚甚時乾
引紅閨睡何曾著記得當初楚天烟水碧
湘樓閣攬玉軫
和金徽自分西風冷落
一霎年光又逢春社萬里鄉
心作憶森森蕭闕茫茫沙漠故園歸歟
行樂花柳江南
儘讓他鶯啼燕掠

法曲獻仙音

寄嚴覽民錢寶汾顧華峯三舍人

蜀肆先生漢家夫子新謁帝承明殿最喜金閨璧人聯
轡吳郡顧榮揮扇更傳聞三珠樹錢起湘靈怨人傳徧
思往日江東婉孌紅燭下挾瑟鳴箏公譙詎料鳳凰
池三子者一時妙選十里朱簾爭看煞黑頭王掾只凌
雲一賦楊意何時方薦

東風齊著力

花朝

春困初濃春愁難妥又是花朝蝦鬚半軸蛾綠不曾描
記得去年玉勒相逢在絲雨長橋鞦韆社綉旗不定畫
鼓頻敲流水綠迢迢人不見妝成知為誰嬌濃春病
酒雙臉印紅潮欲借鴛鴦機論恨回文字帶淚斜挑腸斷
也百花生日只是無聊

絳都春

第一體

咏蛺蝶

誰家佛助想一縷裙花做成紅雨青草如烟淥水如羅

被陣陣東風吹向晴空舞又傍平蕪來去桃花門巷菜
花天氣輕狂無數嬌婷畱他不住更砌畔濛濛牆頭
栩栩飄零蕩漾一春夢裏曾如許料伊也為多情悞只
愁撲蝶園中癡憨兒女

十五家詞卷三十三

欽定四庫全書

十五家詞卷三十四

休寧孫默編

陳維崧烏絲詞三

長調

滿江紅

悵悵詞

咄汝青衫奚不去白楊荒漠歎是處病蘭不笑瘦琴空
削鄴酒紅來心久死越娘紫去懷長惡猛耳酣追憶玉

箋河驚流落 東簫展西紉芍止金谷南銅雀只詞流
騷艷供伊談噓百不憐人游獵賦一生悞我靈光作向
要離塚上一呼余余曰諾

前題

日夕此間以眼淚洗胭脂面誰復惜松螺脚短不堪君
薦幾帙罵人鸚鵡著半牀詛世芙蓉譔笑嶽寄俠骨縛
青衫奚其便 曷不向青河戰曷不向青樓宴問何為
潦倒青藜筆硯老大怕逢裘馬輩顛狂合入烟花院誓

從今傅粉上鬚眉簪歌釧

前題

腰綵唇朱渾妝就腐儒花靨堪噴飯騷腸賦骨也來帖
括兒輩不闕詩酒事乃公偶墮文章却看他年百隊屬
如霞夔州獵 緇千卷澆玄蝶螺千縛漂丹蛭也扶風
歌彈陳畱花鑷梔子街前捐粉盜鳳凰橋下薰香俠更
偏軍夜繞甌山城師常捷

前題

一畝書齋白楊樹今番滿矣想十載墨池滋味不過如
此芍藥風流可賜緋丁香年少宜衣紫問奚為蹀躞鸛
鷗橋無聊子 簫欲哭紅冰璽琴欲笑玄霜葉歎騷茵
墨寶命儕歌婢硯締半車蘭葉鬼詩斟一斛茶花髓也
紅顏絕代可憐人因誰死

前題

白柳黃羊宛繪出傷心片幅酸切處短霜供爨古烟供
讀觴美於君何必怒瓢浮似我原堪哭聽黃陵磯畔夜

深船淒涼曲 梨園內絲憎肉 田園內花欺粟更泉麻
謗錦營旋讒菊百隊錢刀爭作橫 一身風雅單為僕倚
酒悲亂擊紫珊瑚鳴如筑

咏雪

宮闈

雪灑彤墀看帝里風光不惡恰喜是銀裝絳灌瓊雕衛
霍粉掾班中年尚少玉兒宮裏腰初約更太平天子坐
當中簾垂著 御溝畔爭寒雀寶鼎外山呼却喜臣心
似雪朕之良藥琴瑟六花籠翠幄泠泠萬點敲金鑰問

鵝行誰擅郢中才從頭索

前題

閨閣

連日微陰梅花外數聲姑惡憔悴是淨持小女兒家姓
霍春夢晝寒偏易醒鬢絲指冷應難約思沉沉獨自抱
銀箏人猜著 釵梁燕鞋幫雀簪處鷓鴣移來却看糝平
鴛瓦鋪明紅藥沾濕怕汚郎白馬玲瓏不辨奴青鑰問
何時乾鵲噪香奩從天索

前題

塞外

萬里茫茫穹廬畔風狂雪惡嘆當日漢家蘇武功高衛
霍迢遞南天鴻雁信淒涼北海羝羊約縱饑來朔雪亦
堪吞無衣著傳書犬銜環雀忠孝事難忘却看詩誇
同澤史譏嘗藥夢到龍樓飄瑞雪六宮夜宴黃金鑰正
醒時蘆笛起邊愁風蕭索

前題

樓中

六出花飛側耳聽金鈴犬惡正滕六撒鹽飛絮瀰漫揮
霍絀罷額黃簾四捲粧成蛾綠鈎雙約任樓頭倚遍玉

闌干難安著 歌竹子彈翎雀舊時曲都拋却悔姮娥
清冷多因偷藥燒盡深閨紅獸炭閣殘別院文鱗鑰只
雪沙浙瀝打空皆秋千索

前題

袁宅

四世三公袁高士人身不惡也不羨東朝田實西京金
霍大雪不知秦與漢平生詎習從衡約笑本初公路亦
家駒爭殘著 穿花蝶銜梅雀銙銙冷高軒却縱蒲輪
束帛誤人之藥煖足那須東閣被安心自守空山鑰任

門前白盡漢江山休相索

前題

馬上

大獵城南此年少王家鎮惡何況是姿容比玠從奴勝
霍帶雪能騎千里馬殺人不受三章約正射雕時候暮
雲平弓弦著能逐兔能探雀揮杯飲休辭却向諸君
笑語此非鴟藥旦日醉從屠狗博昨宵怒奪城門鑰看
踟躕玉色雪中馳難追索

前題

曲中

舉舉師師正春病心情小惡蚤則是雪飛寶篆寒生錦
霍無力渾如儂樣性難憑恰似郎邊約倚銀篝小語罵
輕狂偏偎著紫簾蒜騰釵雀斜復整行還却好揠殘
玉杵和他面藥睡眼初睜驚六出曲中小響倉琅鑰又
平康狎客喚銀瓶褰簾索

前題

酒家

大雪江天笑萬里北風作惡擽只向屠門大嚼磨刀霍
霍季布田中亡命客盧家堂後消魂約正雪深兀坐酒

樓中思量著 車中婦山頭雀恨不了愁難却總無如
一醉勝他行藥小婦且擎紅玉碗金吾漫鎖春城鑰拍
糟床極愛酒家郎頻呼索

陳郎以扇索書為題一闋

父名陳九曲
中老教師

鐵笛鈿箏還記得白頭陳九曾消受妓堂絲管毬場花
酒籍福無雙丞相客善才第一琵琶手歎今朝寒食草
青青人何有 弱息在佳兒又玉山皎瓊枝秀喜門風
不墜家聲依舊生子何須李亞子少年當學王曇首對

君家兩世濕青衫
吾衰醜

江村夏咏

百頃風潭鎮日展
風漪八尺向此處
未妨飲散且須琴
奕籬笋細醺紅縷
歧吳鹽小下銀絲
鯽待體中脫復有
佳時哦周易
北垞外寒雲白
西崦畔蒼烟積
更水鳬
將子縱橫飛拍
老子難拋白玉
麈少年喜拓黃
金戟總
風情輸與牧牛
兒斜陽笛

前題

野水濛濛掩映處烟扉三兩羨門外黃雲穠穠麥場如
掌叱叱村頭驅犢返瀟瀟江口叉魚往喜田園四月不
曾閒人勞攘嫩晴後桑陰敞老屋下田歌漾更芋區
新灌鵝羣初放婆餅焦啼秧馬活社公雨過縑車響笑
吳儂原住五湖邊曾呼長

前題

畧約東頭有蟹舍斜連菰市追涼處田夫說餅風情靡
靡餽既溜匙薑韭滑餒餽膠口椒橙美更傳聞櫻笋賤

如泥今年裏 义手舞擅拳起缸面酒長腰米想大官
厨味不過如此老我田園河射角笑他仕宦車生耳漏
湖風剛趁此時來欣然喜

前題

碧浪初圓凭水閣脫巾獨立誰作伴數竿籬竹一甌茗
汁似有聲來茶磴轉斷無人處村舂急正日長撥悶枕
書眠斜川集 槿花上珠堪吸豈花底涼堪裹看瀟茫
一派雨蓑烟笠搏黍烏啼勤又嬾鱗魚風起吹還澁恰

衝泥隣叟墊巾來芒鞋濕

前題

雨欲成時聽村北村南鵲鴂行樂處崖門藤束溪腰樹
夾水剪越羅吳縠樣山臨范緩倪迂法任科頭箕踞受
松風新涼雲何必學呼名鴨且自荷隨身鉢儘一丘
一壑此生寧乏雲起怒排臨陣馬澗鳴冷試搗箏甲更
歸來滴滴玉蛆聲糟床壓

前題

丁字畦邊見一帶陰陰夏木扶疎甚釣絲斜漾菱絲大
熟鶯煖鮎魚新上市草香蠶子齊登簇喜炊烟一縷裊
江邊燃湘竹菱雞唱溪流足姑惡叫山光綠聽樵歌
正斷漁歌又續泥滑婦愁微雨饑村深兒趁朝涼讀更
柳塘吹起牂牛風波如縠

前題

罨畫銅官都繚繞吾廬左右論生計蹲鴟一頃菰蒲百
畝矮屋村扉多蘸水澄潭釣艇斜依柳恰月明漁網截

江來歌銅斗 烟漸歛籠鴉舅雨又作鳴鳩婦正湖風
側帽林花墮酒戲就攤錢淮估語悶思斫鱸吳娘手待
明朝重榨甕頭蘼呼溪友

前題

澤國人家門以外水田渺渺無過是明潭淺瀨烟蒲風
篠雪浪江帆喧晝夜雞頭菱角知多少泊數行苓箸忒
玲瓏漁蠻遠 新暑退蘆塘宵殘月映溪堂皎且榜他
碧石沽來清醪一雨平湖涼思滿數聲林笛離情悄正

水雲空濶晚冥冥沙鷗矯

前題

天水空濛蘆花內茆菴一個長夏裏溪干垂興短篷掀
簸十里烟波鷗世界半盂茗汁僧功課更寺門竹翠劇
憐人如何唾洗鉢罷苔陰坐捶琴歇花闌臥愛栗畱
聲脆枇杷葉大便住隨師聽浴鼓再來何日開烟柁約
搓橙剖橘好時光還重過

時過浣
花禪院

前題

三伏炎歊吳牛喘老顛欲裂詎便少池荷半畝山松百
尺赤日紅塵那可耐哀梨并剪無從覓且臨風快讀劍
南詩傾一石堂堂處裝何急咄咄處人都逼冀功名
馬猶關山梁益綠鬢雙螯寒夜擘白頭猛虎霜天射漸
卷終不覺海風生冰車若

方讀劍南
老人集

歲暮渡江用宋荔裳觀察曹顧菴太史王西樵
考功倡和原韻

六幅蒲帆掠江下玻瓈綠漲中流處舉杯遙賀焦先無

欽定四庫全書

十五家詩
卷三十四

恙一片鄉愁殘壘下五更僧語空艫上喜往來白小不
論錢魚蠻餉看蟹舍沙頭漾聽銅斗船頭唱唱岷江
有水速成醇釀估客使船都似馬吳兒踏浪何須杖剪
燭花醉眼看魚龍離奇狀

舟次潤城謁程崑崙別駕

北地孫劉想萬馬川騰谷漲公到日雄關鐵鎖東流無
恙上黨地為天下脊使君文在先秦上更縱橫羽檄氣
偏豪籌兵餉天上月波心樣隔江笛樓頭唱歎江山

如此可消官釀側帽高張臨水宴掀髯勇策登山杖踞
寒崖拂蘚剔殘碑猿猱狀

先生重刻焦
山瘞瘡銘

懷阮亭

隋帝宮門楊柳岸春濃花漲曾密報杜家書記平安無
恙相賞每多松石意此情原在錢刀上記紅橋風月六
年游皆君餉瓜果燕離旌漾禪智寺驪歌唱任吳霜
鬢裏漸為君釀謾說休文圍帶減吾年四十還須杖夜
闌時夢汝帽簷斜論詩狀

欽定四庫全書

十五家詞
卷三十四

聞阮亭罷官之信并寄西樵

鼎鼎朱門滿眼是
膨脝腹漲誰得似
心情半嬾風情微
恙阿堵考君材最下
孔方阻爾書難上
算人間只有菱荷
裳堪相餉
華不注樵風漾
轅固里蠶娘唱
使漸離和曲杜康
佐釀才子為官休
亦好弟應荷蓀兄
攜杖記相人原說
使君非癡肥狀

乙巳除夕立春

爆竹一聲吾廬外
千門烟漲喜今夜
新春殘臘田園無

恙南國舊游稀
眼底西京遺事來
心上記黏雞彩燕
廿年前攔街餉
滄桑換都拋
漾頭顧老休
歌唱且左燒
紅燭右傾家
釀鬱壘敲斜頭上帽
神荼脫落腰間杖
笑人憐桃偶偶憐人同斯狀

前題

父念兒耶珠淚迸溪流
同漲屈指算四時作客
三秋抱恙山左未尋周
櫟下廣陵且覓王
貽上乍榴花時節載
愁還堪誰餉
弱女稼羅衣
漾諸弟隔羈鴻唱又匆匆

去買高郵雪釀寒夜纔歸陽羨棹燈前擬試金焦杖向
泉臺泣數一年間飄零狀

將為鄧尉看梅之行先寄吳中諸子

二陸三張會轟飲劍池春漲吾語女千年花草至今無
恙柳絮微風胥渡口梨花細雨臯橋上自別來僕病負
諸君蓴鱸餉 俚俚甚游絲漾芒芒極離鶯唱漸欲寒
欲煖暗將梅釀我意巾車還躍馬君其挈榼兼扶杖待
月明飽玩萬山巔橫斜狀

贈朱亦巖先生

先生楚人

湘入瀟波極望處
楚天碧漲來領袖
五湖詞賦齊盟無
恙蕭帝宅荒葭
茨外昭君村在秭
歸上羨風騷兩地
仗斯人從天餉
珠玉走龍蛇
漾白雪和幽蘭
唱看江花狼藉
班香醞釀他日
定為公子繡此時
敬撰先生杖謝
君侯未面已憐
余疎狂狀

何明瑞先生筵上作

辛巳歲先生在陽羨令幕中拔予童子第一

陽羨書生記年少
劇於健馬公一顧
風髣霧鬣盡居其

下兩院黃驄佳子第三條紅燭喬聲價恰思量已是廿
年前淒涼話 鐵笛卣南徐夜玉山倒西牕下且擗蒲
六博彈箏行炙被酒我思張子布臨江不見甘興霸只
春潮濺雪白人頭堪悲咤

滿庭芳

紀夢

黃入東風綠來南內夢中春水玲瓏箇儂香粉髻髻也
曾經還是簸錢堂上當年事有影無形高樓外珠圓鶯

脆隔院已聞聲 衷情渾欲訴新愁
點點舊恨星星奈
一場春夢不甚分明此際銀燈耿耿羅衾濕紅淚如冰
難分手滿街細雨愁慙夢回程

鳳凰臺上憶吹簫

閏六月七日為牛女作懊惱詞

翠鵲橋虛珠匏路杳懊惱情思無膠奈粉河一望靈匹
難招寄語天邊織室雙鴛杵纖指休拋停梭怨金徒箭
永青女粧遙 迢迢常時此夜正微褰麝燈小駕龍輶

記衣香鬢影髮髻今宵經年離別依然又淚滴紅綃羞
喜是涼秋不遠准備魂消

和漱玉詞

蘸水垂楊漫天絲柳千條萬緒樓頭正圓水清淺斜靠
簾鉤擬把玉容重整纔勻面恹悵還休慙慙甚今春三
月忒似深秋堪羞韶華縱好奈舊情已換往事難留
只梁間玉剪勸我登樓簾押朦朧未捲青山外不忍凝
眸無過是瀟瀟春雨點點離愁

水調歌頭

被酒與客語

老子半生事恍慨喜交游過江王謝子弟填巷哄華騶
曾記獸肥草淺正值風毛雨血大獵北岡頭日暮不歸
去霜色冷吳鉤今老大嗟落拓轉沉浮疇昔博徒酒
侶一半葬荒丘閉置車中新婦羞縮嚴家餓隸說著亦
堪愁我為若起舞若定解此不

題余氏女子繡西施浣紗圖為阮亭賦

婀娜針神女春晝繡西家聞道若耶溪上淥水漾明沙
為憶吳宮情事暮地養娘來至羞臉暈朝霞忙向屏山
畔背過鬢邊鴉一春愁三月雨滿欄花西施未嫁當
初情事記些些靠著繡床又想拈著鴛針又放幽思渺
無涯一幅鮫綃也錯認越溪紗

夏初臨

本意

麥浪接晴槐陰攔雨小樓無限思量九十韶華誰憐歸

去堂堂屏山敞盡瀟湘漸凌波玉剪飛忙此時天氣今年情緒大抵悵悵天涯羈旅煞甚淒涼慣推中酒怕說思鄉江東故苑正逢櫻笋時光何日吳裝傍柳綿小泊斜陽倚蟲娘一春愁病說與端詳

八聲甘州

月夜守風江店

對清光一碧倚江城獨立怨飄蓬最惱人懷抱危檣匝地殘堞當空遙想故園粧閣擁袖側金蟲歎息藁砧去

烟水濛濛一派銀濤雪浪瀉青銅鏡底白雁聲中料
嫦娥清冷此際與人同且消停三更茅店任隔垣紫馬
夜嘶風消魂也江愁衛玠月想王恭

倦尋芳

早春偶過農部伯父廢園感賦

敗屋東頭偶然行散十分情重滿地苔錢雨榭烟廊都
空蘸水燕雛晴故掠蔭街絲柳風偏弄傷情處是舊家
年少登山一慟記當日孝標姊妹僧綽兒郎嬉遊曾

共多少春衫斜著金鞭閒控一自攀髯人去早江南鶯
燕成何用揀此生繡戶珠簾付之一夢

玉人歌

楊枝今歲二十為于齊紈上作小詞

當日事記陌上青絲垂垂踈地拖烟蘸雨已解藏鴉未
真珠簾額香毬墜做盡輕狂意影濛濛紅日三竿白花
十里水驛飄零子謝青眼相看綰人征騎露葉如啼
直得消魂死如今漸長黃金穗不在長街裏羨畫樓有

主舞腰同倚

八節長歡

乙巳元日

淑景驚催晝梁日影蚤漾粧臺瞳矐金母帳潋灩玉人
杯宜春帖子簪花格漸閨中珠網爭開多少屏搖翠栢
勝颭紅梅長安車騎朝正青絲轡火城影裏初回宮
闕暖祥雲嬉遊罷誰憐江左鄒枚休怊悵喜吳娘已醉
春酩屈指又試燈挑菜城南且拾遺釵

閨怨無悶

春日見城上遊女甚盛戲作此詞

綺陌眠芊上日妖冶彌望玉樓金埒正挑菜年光湔裙
時節陣陣內家車子漾綃幃吹亂千堆雪無人處悄把
春纖小揭都無分別 絡驛碾香塵鋪玉席總向子城
斜處女牆彎裏惹人憐惜此際春心愁絕愁九十春光
如過隙那堪輕暝輕寒朝來想作寒食

瑣聽寒

昔年樓上

此地當年蕭娘粧閣綠牕幽靚傷春情思正日煖人微
病撚花枝悄近羅衣睂峯送語烟難定掩屏風六幅看
他鉅額安黃端正 那更人別後冷落舊粧樓溫家玉
鏡無端又上銀蒜零星還剩只從前簫局桃笙看來不
似今朝景便化為玉剪重來還認紅香徑

花犯

咏白山茶用周美成梅花韻

對西風亭亭一樹箇儂好風味和烟和月也無人憐惜
不勝清麗水精簾額深深倚天寒私自喜似小玉夜長
無伴上牀鋪粉被珠牕一層障疎花似無還似有共
人憔悴愁殺是青霜輕墜記一種紅顏窈窕曾開在三
春臺榭裏只薄命年年流落秋天涼著水

念奴嬌

與任青際飲

乾坤颯颯且沽將楓葉細評今昔笑問幽州今夜雪可

似鸛裘寒色市上吹簫橋頭賣醬淚灑吳楓赤蘇貂空
黑謝郎今已破賊不如冶葉倡條青樓白社磨滅人
年月澀盡并刀悲壯血看有何人憐惜白草關河黃沙
唐宋只對孤鴻說醉澆三國周郎江岸千尺

雲間陳徵君有題余家遠閣一闕秋日登樓不
勝蔓草零烟之感因倚聲和之

得憐堂後有丹樓飛起當年爭羨陽夏門庭能咏絮那
更溪山蔥蒨帶雨房櫳和烟簾幙零亂東湖面碧闌干

裏有人斜映瓊扇 可惜人去匆匆而今樓下秋水帆
如箭老我三吳好男子綠鬢忽然衰賤蔓草霜濃叢祠
露悄白晝鼯鼯現舍南舍北亂飛王謝家燕

題顧螺舟小影

如此佳人是王家養炬謝家過末三世貂蟬連北闕年
少東華釋褐傳粉官前薰香殿側顧盼真英發臨春結
綺舊遊似有瓜葛而今零落堪憐文園多病羸得相
如渴滿目關河愁恨極衰草濃烟塗抹醉矣堪呵灰兮

可溺田也供人奪芒芒哀樂四條絃子空撥

緯雲第三十作此詞因和其韻同半雪弟賦

醉拍闌干歎去者苦多光陰倏忽知我平生悲憤事惟有當頭明月准擬騎鯨不然射虎一吐胸中鬱吳鉤負汝好將衫袖頻拂追想紅燭呼盧青樓賭酒往事推華閨小季已稱三十歲何況暮年黃歇斜閣秦箏橫攤越絕燒盡爐中杳憑高遠望江流一綫如髮

送子萬弟之睢陽

悲哉秋也況登山臨水黯然欲別千里長江流夜月萬
里長城空濶白板船開青楓樹老極目徒悲切君歸梁
苑漢家何限陵闕疇昔讓棗推梨謝家兄弟才氣人
爭說一夜西風吹蒼莽吹散封胡過未兄作楚囚弟成
秦贅枕上鷗啼血阿龍超甚教他長誦明發

阿龍五弟
小名時同

四弟在
睢陽

龍眠公坐上看諸客大合樂記丁酉中秋曾於
合肥公青谿宅見此今又將十年矣援筆填

詞呈龍眠公并示樓岡太史邵村侍御與三孝廉

醉來闌入正司空筵上一羣腰鼓老子婆娑牀上坐
雙鑠聽歌似虎一片西風千堆畫燭月好清輝苦回頭往
事青溪舊夢重作謝公笑問兒郎此間何處畧記隋
堤路老矣廉頗猶健飯莫負紅么翠羽人在當場曲逢
入破白髮休予侮新磨幡綽世惟公等堪語

次夜韓樓燈火甚盛仍聽諸君絃管復填一闕

紅燭如山請四筵滿座聽僕搥鼓此日天涯謀作達事
更難於縛虎僕本恨人公皆健卒不醉卿何苦金元院
本月明今夜重作總是狎客南朝佳人北里占斷蕪
城路好景也知容易散一別沉鱗羈羽狂受人憎醉供
人罵老任雛姬侮揚州燈火明朝人定傳語

乙巳中秋用東坡韻寄廣陵諸舊游

月明如此問江山今古幾多陳迹誰把桂輪今夜裏碾
破楚天新碧玉白無聲銀河有影一片清虛國醉餘莫

笑舊游吾尚歷歷 記得杜牧司勳江湖落拓曾作揚
州客愛殺打頭天上月管其中秋七夕一別淒然吾生
可惜塌盡鷗鵬翼夜云深矣依稀樓外吹笛

酬歸德侯仲衡

天陰歲暮正情如中酒人初賦別忽接繁臺書一紙飛
下梁園白雪悼遠傷離撫今追昔字字皆辛切狂歌數
闕唾壺之口都缺 每欲窄袖輕衫礪礪道上小犯寒
風冽耳後弓弦聲霹靂一片風毛雨血雅願終違壯遊

未果世事多枝節中宵輾轉布衾今夜難熱

瑶花

秋雨新晴登遠閣眺望

青山如黛淥水如羅映真珠簾罇金閨瑟瑟正清砧隔
院擣衣纔罷登樓遠望見一帶碧雲輕瀉更蕭關征雁
濛濛愁煞江南此夜幾回搔首沉吟歎今日深秋前
朝初夏流光遞換何處覓鈿車羅帕傷心故苑依然似
天涯客舍對秋風強舉金尊又是夕陽西下

欽定四庫全書

十一
卷三十四

高陽臺

題余氏女子繡高唐神女圖為阮亭賦

巫峽妖姬章臺才子賦成合斷人腸
綉閣停針含情想像高唐渚宮舊跡
今何在不分明水殿雲房
蟬髮憶著行雲恰費商量
蘅皋暮雨淒涼只楚天一碧與夢
俱長霧縠霓旌幾時重得侍君王
小唾紅絨思好事却剪刀聲出迴廊
更添些紅杜青蘋做出瀟湘

東風第一枝

咏綠萼梅和呂聖求韻

粉界檀腮烟籠膩頸玉奴素質輕約風前乍坼紅鬚月
下低含綠萼一枝水上也不管鶯啼燕掠最憐他不甚
分明飛破瀟湘白鶴隔蟬翼層層都薄打稊雪冷冷
又落有情故亞樓頭無聊自開屋角日高慵起慢搖動
綠紗簾箔看苔錢色上梅花碧透何郎官閣

解語花

咏美人捧茶和王元美韻

蕃馬屏風雛鶯庭院竹下茶聲細粧樓小倚闌干外汲
取春流淺試乳花銀蕊烟裊上綠鬟千縷溜橫波鑪火
初紅儘帶嬌憨意 捧處輕搖蟬髻問阿誰年少消受
纖指珠鮮玉腕語笑處故惹檀郎驚起沉香亭婢只領
畧凝酥佳麗怎如伊生小江南偏解旗槍味

咏美人捧觴和王元美韻

楚天卵色吳地鶯聲惹得愁千斛春衣慢贖且泥他粉
白斟來蟻綠蓮鈎小慙行過了銀屏六曲嬋烟鬟縹色

杯輕帳裏圍顏玉 笑顫流蘇影簇怪佯醒不醒罰依
金谷玉郎低囑沉醉也休作難人題目芳心暗逐羨杯
底鴛鴦同宿趁花酣雙抱紅篝圖取春眠足

夜合花

為丁子硯催粧

人柳腰眠聖檀額注犢車催下屏風勝常道罷腮邊春
暈微紅呼燕燕喚蟲蟲桂堂西小著輕容問伊姓氏父
名鄭季母號樊通 鶯聲夜半玲瓏多少帳前細咳爾

汝歡儂今宵夜冷勸郎文籍休攻蘭缸細鴨鑪濃卸花
簪早傍薰籠羨他大婦偏憐敬禮代掩珠櫳

換巢鸞鳳

咏燭

暝色初臨正金荷灼灼鳳脰沉沉燒殘終有淚剪斷豈
無心饒脂注得十分深光翻金粟影動瓊林春藥上看
帶笑花開似錦瘦沈躊躇甚曾記華堂半減情難禁
金鑰傳時玉堂難處對對紅酥翠沁蓮燈緩導上元遊

蘭膏濃挽平康飲如今絳蠟照人長是孤寐

曲游春

花朝

穠春無限好正雲翦春羅小鋪明鏡滿目紅芳記淡烟
斜日江南時景紅板橋西路有萬縷綠楊拖徑更憐次
第風光巧鬪吳娘花勝回首天桃露井憶檀板銀罌
那時偎並人在花朝有嬋娟姿格玲瓏情性自後堂分
袂長則是如醒似病可惜憔悴蘭成淒涼家令

絳都春

第二體

乙巳元夜

春宵三五正碧雲合處冰輪斜挂暗省年光漫數韶華
偏沾惹平生舊事都忘也難忘是鳳城鴛瓦無燈無火
有花有月偶然吟寫此夜追歡買笑有天街似水暗
塵隨馬詎料而今幾陣東風譙樓下吹去了香車羅帕
春衣卸思量如乍且尋故老開元月明閒話

石州慢

憶舊用高季迪韻

醉拍雕闌思憶從前淚珠頻灑東陽倦沈多愁多病瘦
軀堪把水市津樓奈他繡被濃香舊時閒事偏縈惹顛
倒覓烏絲檢霜毫細寫妖冶此夜蟲蟲曾囑監奴歲
甡慢下且湘簾銀燈邀人白打摘盡銅籤小婢故惱人
行任他嘶斷門前馬懊惱後堂前又年光換也

玲瓏四犯

月下聞笛

三五良霄看雲月澄鮮幽輝盈抱羈旅無眠愁思幾番
縈繞滿園春水空濛映翠竹枝枝斜裊恰嘹唳誰家入
破遙想小樓空悄因思天寶梨園隊有金雁鈿蟬絕
妙更偷把寧王玉笛吹徹誰知道一自華清人散繚垣
外閒花野草此生頭白天涯再聽伊涼別調

霓裳中序第一

咏水仙花次尹梅津咏茉莉韻

珠攏寒粉靨偎罷銀篝紅獸熱恰值青霜駭眉有一種

瑤芳白花翠葉海天皓月羨玉娥生長綃闌斜春渚竟
川含綠一笑嫣然絕妙絕頓成離別長則伴兒家粧
簾有時墜落簾弗看盡人間多少蜂蝶五銖寒到骨悵
千里洞庭飛雪傷情也舊家何處悄對素梅說

憶舊游

寄嘉禾俞右吉朱子葆子蓉

松陵東去路記水程烟驛幾多般鴛鴦湖裏泊重城燈
火一派潺湲船樓玉人行酒碧浪瀉紅顏更羈塵丹鱗

卷三十四
綿濛黛甲上下哀湍 十年成間別想怪侶狂朋一樣
啼斑縱玉清歸去怕滿天風露猶憶人間只是南湖柳
色憔悴不堪攀長望語兒亭故人為我且加餐

齊天樂

暮春風雨

小樓昨夜東風到吹落滿園空翠時有茶烟絕無人影
好箇他鄉天氣淒涼欲死見燕剪平蕪柳拖春水暗省
從前如塵似夢最難記 當年曲院寒食餚香花更煖

許多情事金斗猶溫玉釵還響已送愁人到此也思寬
慰奈把酒聽歌幾番不是暮雨瀟瀟記吳娘曲子

水龍吟

江行望秣陵作

輕舟夜剪秋江西風鱗甲生江面瓦官閣下方山亭外
驚濤雪片一帶蔣州千尋鐵鎖等閒燒斷只波間皓月
流光欲下舊曾照金陵縣何處迴颿槳鼓更玉笛數
聲哀怨回思舊事永嘉南渡流人何限如此江山幾人

憐惜斜陽斷岸正江南
烟水濛濛飛盡楚天新雁

瑞鶴仙

上元和康伯可韻

昔游思後苑記天上月圓人間月半
六街笑聲滿看火蛾金繭春城飛遍
琳宮瓊觀隨處掛鰲山燈爛最銷魂
深巷殘更小顚門邊雙釧休羨無多勝景
有限芳辰不堪追玩紅篝熏煖和衣卧
誰低喚怪流光一去鈿車羅帕吹煞東風
不轉只玉梅梢上冰輪依然相見

鄒程邨母夫人壽

千金今夜直羨阿母白髮珠袍一色稱觴蓬閭側有南路豪家東朝貴客華駟列戟向尊前瑩篴醉擘倩何人笑問君家家本難忘易識猶憶曾陪董相閒過鄒陽讀書騎射賢哉湛母截髭親為置食看懷清臺畔夫人城上無論功名赫奕只膝前有子談天生兒亦得

南浦

泊舟江口

吳檣晚眺看隔江螺髻碧離離龍虎銷沉無據往事不
勝悲憶昔曹公飲馬對江流橫槊賦新詩羨三吳人物
伯符公瑾年少更雄姿今古芒芒天塹捲神鴉日暮
舞空祠多少南朝事業斷岸矗殘碑月白估船銅斗唱
西風外雲水瀾瀾歎多愁洗馬銷魂偏在渡江時

氏州第一

秋日懷東臯諸子用周美成韻

千片芰荷零亂簾捲西風人倚樓小橫竹泠泠峭風歷

歷一碧遠天縹緲非淡非濃颭水國村村斜照中酒心
情欲寒天氣暗催人老 三十六鱗江上少奈無限舊
愁繚繞沙鳥將雛江鳬傍母秋水柴門抱正搓橙時候
也題糕近龍山歡笑寫盡吳牋盼晴空翠屏都曉

綺羅香

清明感懷

綠水樓臺青春院落又是韶華百五飴粥偷錢過了匆
匆時序怕今年玉剪來時是去年鈿車停處最難憑輕

暖輕寒天涯羈客甚情緒少年此日嬉游有窺簾綺
態當壚俊侶一自飄流冷落天桃門戶西樓外幾陣鶯
花北邙上一堆羊虎向斜陽斷碣殘碑多少橫官路

初夏連夜於許茹庸仲修席上看諸郎演牡丹

亭有作

許掾多情清和佳節連夕嬌歌妙舞料得睂峯碧到愁
時都聚記昨宵銀瑟初停又此夜紅牙再補看一羣燈
下諸郎依稀盡解此情苦獨有江東客為家山路遠

倍增淒楚回首朱門畧記蟲娘庭戶好院本全部笙簫
沒心情半生羈旅比年時攜手聽歌多了黃昏雨

金盞子

咏燈


一盞紅缸灑玉膏鴛綃皺處偏凝春夜照梳頭蓮籌香
淒清牙蒜犀釘便教剪盡銀荷奈芳心耿耿敲翠竹悄
喚綠翹簷前蘭燈將暝喚遍無人應且獨自纖手靠
粧臺挑鳳脰宛轉處重思省當時風細人靜曾偎壁帶

流蘇剔銀虹潛等紅稠冷空對並蒂燈花怎生相稱

永遇樂

京口渡江用辛稼軒韻

如此江山幾人還記舊爭雄處北府軍兵南徐壁壘浪
捲前朝去驚帆蘸水崩濤颭雪不為愁人少住難永嘉
流人無數神傷只有衛虎臨風太息髯奴獅子年少
功名指顧北拒曹丕南連先主霸業開東路而今何在
一江燈火隱隱揚州更鼓吾老矣不知京口酒堪飲否



十五家詞卷三十四

欽定四庫全書

集部

十五家詞卷三十五至
七

詳校官內閣學士臣尹壯圖

侍讀臣孫球覆勘

總校官降調編修臣倉聖脉

校對官編修臣沈清藻

謄錄監生臣任銜萱

欽定四庫全書

十五家詞卷三十五

休寧孫默編

陳維崧烏絲詞四

長調

尉遲杯

別況

春江上見鷓鴣濛濛飛碧浪草間珠露猶垂岸左紅蘭
纔長東風斜日小玉門前纔烏傍正離人好夢初醒雙

擁紅篝凝想 因念十載漂零長則在水驛烟程來往
手把金尊和淚說枉說是畫眉張敞如今便花開花謝
祇憑得紅襟梁上講送郎行獨凭小樓櫓聲水面搖響

二郎神

第一體

春寒感懷

餽飮天氣況是天涯羈旅悵悵類浮萍飄泊碧波南浦
傷情不語且檢紅綿燈下看瞥見了深閨針縷想當日
執手叮嚀預料春寒如許 凝佇沉吟欲著幾番推去

任春衣紅藤箱底閣甘領受疎風嫩雨擬向春江傳此
意奈江上雙魚無據恨點點楊花疊疊青山遮人歸路

二郎神

第二體

咏梅子

一株梅子正纍纍粉紅牆後問葉底枝頭為誰酸楚却
又為誰消瘦太息春歸誰來問記不起鶯花如綉向香
香簾攏陰陰院落伴人長晝纖手幾番小摘已醒殘
酒更撚向粧臺玉娥低說曾見依稀如豆翠已漫空黃

偏微雨又到傷心時候
算顆顆冷香鬆脆想爾料難勝
口

合歡帶

為吳陵宮掌雷賦催妝詞

羨緋羅燭吐銀牆燈影背響鳴璫
夾路如花還似霧戟
門前步步荀香劇憐春夜花融錦瑟月亞金堂
況畫睂
夫婿清河小弟杜曲諸郎
紗籠徐引繡幙斜張
藍橋
擣就玄霜瓊島仙花偏並蒂珠簾畔
一朵笙囊朝來更

喜五銖裙細百子釵長問傍人宜稱何如生憎喚作宮
妝

花發沁園春

月下布席綠萼梅花下同友人小飲

借月為花將花做月濛濛一樹皴玉銀椀篩春瓊簫暖
夜值得珍珠幾斛冰肌睡足更掩映生綃六幅念月姊
徹夜孤寒梅妃自小幽獨花影風搖蕤蕤任春城夜
闌畫鼓頻續金爐燼處珠斗斜時月與梅花微綠清輝

滿目標吹滅枝枝銀燭夜深沉我醉休扶和月和花同宿

瀟湘逢故人慢

題余氏女子綉柳毅傳書圖為阮亭賦

龍綃一幄有靈芸針線刺鳳描鸞秋水漾波闊正洞庭
歸客憔悴思還牧羊龍女恰相逢雨鬢風鬟看多少沙
明水碧一天愁緒漫漫却又早來橘浦見兒家綃宮
璇闕激水生寒貴主下雲端更箱開青玉珀映紅盤海

天良夜論恩情可似人間綉到此料應長歎眉峯斜蹙
湘山

送王亦世歸漢陽兼寄懷人

西風湘楚正湘竹如啼湘禽如舞湘岸飛湘雨更淥水
微波青山可數幾幅烟帆採不盡白蘋紅杜想此際仙
令歸艖一派江山今古 女娥祠巴子國看歷歷晴川
萋萋芳樹風外催津鼓恰人在洞庭秋盈橘浦官舫瑤
琴總彈破沙清月苦倩楚塞白雁同歸并寄阿戎此語

泛清波摘遍

咏沼內紅魚

吳娘水閣幾曲金塘時聽紅魚跳波響翳然花竹日高
舟尾浮菰蔣粧臺上傷春天氣中酒心情斜溜明牕還
細相照水釵傾投餌鬟偏幾遍惆悵朝霞漾寄到啼
棧染血帶得落花鋪絳愛爾絕代紅粧水雲高曠渾無
恙嬌鳥籠底去來美人影中生長莫管畫溪笠澤粘天
風浪

擊梧桐

酒闌感賦

被酒陽狂當歌慨慷幾遍雄心翫
麟蘆中人竈下養市南屠狗城東賣醬更邀昔日知交白擲劇飲掀髯抵掌
擊碎唾壺拍碎胡琴舊事流波一往想像衣香沉吟
手粉十載後堂情狀燈炮後夢回時曾否玉人無恙醉
後猛然思省人生何必定多情且潦倒短衣射虎學藍

田李廣

一萼紅

寒食記事

玉津園記箇儂門巷淥水漾呆愚社燕低飛錫簫輕弄
東風隋柳如絲正客裏禁烟天氣趑流鶯啼處立多時
蒜押雙搖藥欄九轉瞥見師師十五破瓜年紀恰梳
頭纔了鉅額偏遲紅玉勾人碧虛留客篆烟半裊金猊
魂斷是瓊閨有縫迸他修竹兩三枝料爾一春寒側長
倚腰肢

薄倖

賦得水晶簾下看梳頭

戟門春暖紅日漾圓冰清淺
簷一帶茱萸牕網便是箇
儂粧院素領巾半幅烟綃行來剛被微風捲更點點斜
紅溶溶泓黛嬌面欲勻還嬾恰十載傷心事釵響衣
光何限只玉纖撩鬢春蔥絰額一番回想腸應斷風流
放誕記千金艷質粧成愛映春流看別來香閣峭冷尖
寒應滿

風流子

南徐春暮程崑崙別駕招飲南郊外園亭同方
爾止孫豹人談長益鄒程邨何雍南程千一

賦

來時寒食近且近耳詎料竟殘春正僕本多愁何妨作
達官如不醉遮莫傷神見此際酒旗斜喚客榆葉弱縈
人燕子風前是何言語柳條烟裏別樣腰身名園行
樂處追歡笑何限寶馬香輪況遇風流刺史瀟灑遺民

奈東望蔣州春潮拍拍北來瓜渚暮雨紛紛還怕當歌
對酒忽又沾巾

翠樓吟

席上贈伎時伎三日後卽落樂籍

銀甲捱纂珠條絡鼓清歌屈柘如縷人到離筵裏儘眉
黛愁將碧聚縱橫玉筍似綠柳凝烟紅蘭著露欹雁柱
一場春夢沒些情緒他日縱過侯門只光延坊畔櫻
桃一樹奈銅輿催上更糝遍一街絲雨橫波重注看斜

側帽簷銷魂無語紅蠟底新官舊主一般胡覷

小梅花

感事括古語做賀東山體

君莫喜羊叔子何如銅雀臺前伎拍檀槽橫寶刀屠門
大嚼亦足以自豪人生有情淚沾臆雖壽松喬竟何益
將黃鬚眊五湖如此江山應出孫伯符傷心史可憐
子卿復何為爾大江東一帆風來往行人閒坐說玄宗
連昌宮中滿宮竹白項老烏啼上屋穆提婆蕭摩訶且

自吾為楚舞若楚歌

前題

咸陽樹驪山路可憐當日作事悞殷仲文王衛軍國家
此輩要是可惜人憶君清淚如鉛水奴見大家心亦死
令壺齟收中吾聊且酒酣耳熱歌嗚嗚莫櫟釜行學
估羞與噲等伍金屈卮揚叛兒阿奴今日不減向子期
生子當如李亞子奴價今年大勝婢轂朱丹作高官未
若小樓吹徹玉笙寒

女冠子

第二體

詠美人坐禪和彭美門原韻

蕭蕭禪榻百和旃檀薰透花冠啼罷烏龍睡熟紫竹清
幽黃帔瘦小袒緋羅袖雙疊湘裙紅吐花邊一綰最憐
他趺坐挑笙一派秋紅綠皺靈山參破風幡後奈斗
年前事終向心頭有佳人不偶記惜玉情懷竊香時候
迦文消夙垢正值鐘聲報午苔陰移晷問籠中白雪衣
娘一卷名經完否

洞庭春色

甲辰除夕懷西樵司勳阮亭主客

歸去來兮鬪鷄走狗閭巷沉浮歎臣之壯也如人何事
身將隱矣于世焉求四十男兒悲老大笑那便車前少
八騶填曾事看人奴笞罵一半封侯回首風塵萍梗
怪年來長傍迷樓記廣陵風景青山綠水瑯琊兄弟長
史司州名士終朝能妄語更頭沒杯中笑不休紅燭夜
對故園椒酒想爾風流

玉山枕

咏白鸚鵡

小院清麗蜻蜓翼空如水楊花門戶梨花院落風漾金
籠蹁躑不止雪衣簷畔誦迦文恰生小怕施朱翠有玉
奴夢醒無慘撚瓊枝向月中調戲尉佗臺上當年事
心兒內重提起拋家離井好風良夜腸斷三年魂消萬
里從來薄命玉客人也只是飄零如此倩銀鴻問訊珠
娘素馨花想此時開矣

白鸚鵡來自嶺南故云

沁園春

廣陵客邸送緯雲弟之歸德

客裏送行蕭統樓頭且盡一杯正節近清明柳絲漸長
時逢上巳燕子將來兄往淮陰弟遊河北兩地翻飛立
馬催斜陽外見各天鴻雁顧影徘徊市樓轟飲如雷
笑我輩豈常貧賤哉奈花驍將離爾心欲碎地名蕪苑
我賦偏哀此去睢陽也知懷古有日經過古吹臺還應
問有兔園上客狗肆奇才

山東劉孔集招飲廣陵酒家係故郭石公宅

魯國劉生笑賣寶鞭攜上糟丘更一時意氣徐陵袁紹
六朝才調綠幘紅鞵如此人生奈何不樂况值離鴻叫
暮秋憑闌望見風廊水榭丹漆雕鏤當年此地風流
記畫戟門開溝水頭羨羊侃侍兒彎弓貼地李波小妹
走馬當樓蔓草斜陽空園絲雨爭說汾陽郭細侯還長
嘯只眼中花月誰似揚州

冒天季五十書贈

慷慨悲歌旁若無人進君一觴更四絃入破聲哀以思
三更被酒臣醒而狂末路崎嶇舊游零落哀樂縱橫不
可當生平事曾短衣匹馬錦瑟紅墻 歲華一去堂堂
又半百蹉跎黯自傷歎醉必沾襟是兒可念飛而食肉
此志難忘人道買臣今年富貴路鬼揶揄笑一場重酌
酒看玉山筵上今夜顏唐

泊舟惠山看六朝松并艮嶽石

昔歲我來乘白羊車著紫鼠裘愛支離者叟霜皮黛甲

玲瓏者文雁蕩龍湫王謝家兒宣和遺老爾正愁時我
亦愁曾經過看累朝興廢百代王侯別來歲月如流
歎赴壑修蛇掣不休又風吹雨溜幾場兒戲藤纏蘚蝕
一樣蜉蝣石豈能言樹猶如此何怪書生竟白頭重來
到吹一聲鐵笛叫破孤秋

為泗州謝震生廣文題影兼送其之任山陽

我愛先生其冷者官其熱者腸羨康樂宣城君之家世
蟻珠浮磬此是家鄉人道馬曹我知魚樂首着堆盤也

不妨吳綾上問傳神阿堵何物長康
纔成半闕淒涼
忽念爾將離黯自傷記淡月微風曾經批抹好花新茗
相與平章此去淮陰古多惡少我欲來游醉幾場君求
我在韓侯臺下漂母祠旁

八歸

二月十一夜風月甚佳過水繪園聽諸郎絃管
燈下因遣家信淒然不成一字賦此以寄閨
人

彈得絃清飄來笛脆曲室諸郎歌管他鄉風月佳無比
只是中年以後心情頓嬾遙憶故園粧閣上鎮玉臂雲
鬟淒斷傷心處何事尊前聽一聲河滿却是絳河欲
沒珠繩乍轉畫角譙樓哀怨舊事如塵新愁似夢可惜
一場分散奈天涯滋味瞞不過南歸魚雁吃霜毫纔提
還倦莫慮春寒羅襟紅淚煖

摸魚兒

家善百自崇川來小飲冒巢民先生堂中聞白

生壁雙亦在河下喜甚數使趣之須臾白生抱
琵琶至撥絃按拍宛轉作陳隋數弄頓爾至致
余也悲從中來併不自知其何以故也別後寒
燈孤館雨聲蕭槭漫賦此詞時漏已下四鼓
矣

是誰家本師絕藝檀槽掐得如許半灣邏迤無情物惹
我傷今弔古君何苦君不見青衫已是人遲暮江東烟
樹縱不聽琵琶也應難覓珠淚曾乾處淒然也恰似

秋宵掩泣燈前一對兒女忽然涼瓦颯然飛千歲老狐
人語渾無據君不見澄心結綺皆塵土兩家後主為一
兩三聲也曾聽得撇却家山去

賀新郎

雲郎合卺為賦此詞

小酌醪醕釀喜今朝釵光葦影燈前滉漾隔著屏風喧
笑語報道雀翹初上又悄把檀奴偷相撲朔雌雄渾不
辨但臨風私取春弓量送爾去揭鴛帳六年孤館相

依傍最難忘紅蕤枕畔淚花輕颺了爾一生花燭事宛
轉婦隨夫唱努力做藁砧模樣只我羅衾渾似鐵擁桃
笙難得紗牕亮休為我再惆悵

賀阮亭三十

牛馬江東走陪滿座鄒枚上客為君稱壽七葉貂蟬連
鳳闕坐擁銀箏翠袖又兄弟才雄八斗三十王郎年正
少恰黃金鑄印雙懸肘此意氣古無有淡黃十里隋
堤柳更多少竹西歌吹樊川詩酒滿目關山原不惡只

是繁華非舊奠惟有文章不朽
藪藪珠簾人不捲看使
君燈火春城口依稀羨歐陽守

瓜步與姜子翥

佛狸祠下別看此處江花如練
江烟似織憶昔結交堅

戴笠江左周郎英發正爛醉金釵之側
宋玉

右計倪甫

俱大俠更潁川年少風流客仰天嘯冠纓絕
十年往

事同陳蹟恰傳聞洛陽金盡櫟陽獄急一旦二桃疑盡

釋廣柳車中人出又買得如花小妾送客驚心千萬里

但銷魂此際真愁絕吾自有崩通舌

甲辰廣陵中秋小飲孫豹人澆堂歸歌示阮亭
把酒狂歌起正天上琉璃萬頃月華如水下有長江流
不盡多少殘山剩壘誰說道英雄竟死一聽秦箏人已
醉恨月明恰照吾衰矣城樓點打不止當年此夜吳
趨裏有無數紅牙金縷明眸皓齒笑作鎮西鸚鵡舞眼
底何如程李詎今日一寒至此明月無情蟬鬢去且五
湖歸伴魚竿耳知我者阮亭子

月夜看梅花

皓魄光微淥喜東風瓊枝壁月清輝景數顧影娉婷無
一語吳女纖腰初束斜倚在珠闌曲曲看到夜深風露
冷浸簷前一片團圓玉吾醉矣共花宿 愁腸被酒還
相觸且狂歌莫言興盡再斟醺醪忽憶開元當日事中
有梅妃蛾綠何必羨玉奴新浴可惜樓東三十樹雨霖
鈴都做連昌竹花應歎睡難足

乙巳端午寄友用劉潛夫韻

醉凭闌干吐倚清狂橫陳冰簟後堂無暑聞道吳兒工
作劇弔屈龍舟似虎我欲唱公乎無渡纍自沉湘卿底
急枉教人搗碎迴颿鼓楚江畔葦花舞 陡然磊砢多
如許喚靈均前來共語酹君椒醑呵壁荒唐何必問死
累人間角黍尚不及伍胥濤怒忽發狂言驚滿座料諸
公知我心中苦酒醒後重懷古

為冒君苗催粧

遲日嬌鶯轉簸輕風半攔芍藥參差人面珠絡流蘇屏

壓角十里龍綃微捲料好夢一春曾選節近菖蒲喧笑
語借五絲先做同心纏畫梁上乳雙燕笙歌沸處蓮
籌轉剪銀燈紅酥檀暈暗窺韓掾小弟陸家工贈婦春
蚓花箋蟠徧何況是丹青能擅百種烟巒俱易畫遠山
眉第一須蔥蒨看小試君苗硯

夏雲峯

第一體

夏雨

楚簾生波湘簾著水夏淺勝春時候豆棚底心情小惡

棟花外年光空逗記三春帽影衣香漫細數疎狂未居
人後奈六幅蒲帆歸吳雖健却又愁如中酒 況是梅
天絲雨慙儘接藍野水點來都縐一生事秧車催去四
月景蠶房攔就倚小樓看盡吳田只漠漠陰陰不堪回
首且白練裙綠苔錢間寫小詞懷古

引駕行

東既庭

全吳館內破楚門邊十年事記冶遊作使與卿並倚吳

閨清狂簾前壁月橋頭畫轂鈿轅畔游閒公子紅燭銀
箏醉玉溫香平康況曾經邂逅枇杷巷口掃眉娘想那
日妖嬈喚馬藥欄微雨碧城涼難忘無端一別腰身
瘦盡東陽奈曉風殘月夢回酒醒往事微茫堂堂問江
東士女塗轍誰令我輩妨料章華才子也應點兩鬢吳
霜

蘭陵王

春恨

香腮托人與梨花俱弱東風外斜壓香衾感損瀟湘遠
山角鏡鸞空掩却愁覩玉肌減削又不是中酒傷春盡
日沉吟倚粧閣唾花裙上落奈紫棧纔溫紅綿正薄
水晶簾額輕寒絡更陣陣春雨懨懨殘日小樓欲睡那
便著且自漱春酌飄泊舊時約只抑綿花絮年年如
昨綠徧平蕪天又各念馬嘶門外聽來常錯清明寒食
無限恨燕子覺

十二時

偶憶

綿濛二月如酥雨，做出銷魂天氣。更獨客、冷冷清清地，拚則向紅篝倚燈炮。香焦天寒酒醒，往事難提起，想那日元夜迷藏，楔日鞦韆人在綠楊絲裏。更當初戟門嬉戲，一部烟花軼記，簾畔分釵屏間惜曲，無限懨懨意，便海棠月上夜深，誰放花睡。奈幾年飄零羈旅，已隔千山萬水。昨歲銅街記，曾一見、隱隱卓金車子，恰柳花如夢，又早香輪過矣。

大酺

七夕坐客大合樂漫賦

歷歷銀颺簾外落又是一番節序今宵停寶杼正南部
烟花西風牛女端正窺簾輕狂喚盞多少良儔俊侶有
白髮何戡青春張緒流商刻羽漸露濕瓜筵月穿針孔
紗幮無暑醉搖梳子樹是鬱金堂後西偏路誰知道
三生杜牧前度劉郎重來還到聽歌處鈿盒一朝分記
不起長生私語莫此際情偏苦離多會少豈獨天邊河

鼓客且歌完金縷

多麗

反韻體

題余氏女子繡陳思洛神圖為阮亭賦

問多情今古誰堪雄長也無如曹家天子西陵臺上虛
帳更傳聞東阿子建年少情緒駘蕩水上明珠波間翠
羽洛神一賦神飛魂愴只一事家王薄行難對中郎將
恐他日黃鬚兒子亦起非望又剪出輕雲態度繡成
流雪情狀難香閨一雙纖手比似文心誰瑜亮便使當

年袁家新婦自臨明鏡圖嬌樣也還怕傳神阿堵宛轉
須相讓凝眸處婀娜華容千秋無恙

前調 平韻體

為李雲田周少君寶燈題坐月浣花圖

暖紅篝月輪斜挂粧樓恰雅稱香閨心性下堦小試蓮
鉤好風篩窓紗影碎涼露浸簾幙紋流裙帶微飄玉奴
私語人生易值此宵不何況是楚天巫峽 李漢陽人 嫦娥別
種清幽羨此夜月光人面端正溫柔 漸滿砌玲瓏紅

藥如啼欲睡疑羞倩輕綃秋棠宜盥央小玉夜合將收
更與傳言月波堪昏莫問銀床玉井頭想像處花前人
月永夜費凝眸還只怕畫圖難肖搦管增愁

箇儂

原名六醜揚
升菴易今名

孫坦夫招飲女史澹容家分賦

轉辦蓮巷左見梵宇粉紅牆角恰值箇儂曉粧勻面藥
花冠喔喔正蟬腴象格西風輕颭有碧桐花落褻紈秀
鬢工調謔人是雙文藝精六博種種玉纖花弱喜宿醒

微析春心猶惡 酒狂如昨但人生行樂此際秋娘最
憐輕薄樽前況有韓嫣碧雲天偷擲鸞簫低學更主是
多才孫綽平康巷膝席分曹滿座雄談馬稍囑金吾莫
收更鑰別來時斜倚朱蘭口偶然思著

丙午元夕雨

聽今宵疎雨也算做一年元夕舊事流波一往如何覓
香街馬跡記常年燈市鞭絲帽影有許多相識闌珊燈
火梅精立雅淡衣裳輕盈姿格人月同時一色便旁人

也道此是秦虢 萍蹤頓隔怕舊時李益昔日君平無人憐惜簷前點點滴滴似替人流淚學人悽惻拚此去花朝寒食都只向雨雨風風趁盡春光九十紅篝擁夜寒側側擬此情并春柑傳與何由寄得

夜半樂

春夜觀小伶演葛衣劇

任西華故事也

當時江左才調樂安任昉風麗推無偶記驃騎陪軒秘書把袖青宮好士朱門結客更聞出入宮輦翱翔苑囿

奈玉樹人世偏難久諸郎憔悴至此西華東里南容北
叟漫細數平生密親懿友葛帔誰嗟練裙疇惜可憐野
鮮動輪門稀漬酒想此事將毋古今有閱此不覺滿
瀉瓊舟狂斟玉斗我論交絕君信否倘然疑君再聽當
筵紅豆算蘭薄何必籌身後清歌且喜簾垂綉

六州歌頭

邗溝懷古

江東愁客隋苑暗經行鶯語滑游絲細夾衣輕正清明

追憶當年此際樓臺外鞦韆畔棠梨樹垂楊渚玉簫聲
一自風烟滿目傷心煞水綠山青看江都雖好舊跡已
飄零憔悴蘭成意難平念寄奴去黃奴老今古事可
憐生回頭望隔江是石頭城草縱橫樓船南下日君王
醉未曾醒宮車出晚鴉鳴使人驚惟有一江春水依稀
似舊日盈盈想參軍鮑照欲賦不勝情此恨曾經

小諾皋

夏雨

密灑修梧輕敲疎竹一雨碧天如此正日長亭院無慘
羈人徙倚滿目烟潭草閣多少紅蘭白芷更明珠瀉向
荷錢容裔極浦沉沉前汀瀟瀟又小樓玉簫和雨吹入
愁人心裏無限事思量起此際凭蘭幾回推枕總是
故園千里忘不了冰簟生寒玉釵著水風景而今依舊
無奈鬢絲不似攆流落楚尾吳頭而已今夜樓中明朝
篷底便瀟湘宋玉悲秋未必此情堪比天欲暮雨不止

寶鼎現

甲辰元夕後一日次康伯可韻

是歲元夜月食

星橋未鎖大樹仍放風光清綺渾不散游童白馬雜香
笙簫闌寶砌香奩畔又夜情思整笑看蘭缸結藥漸耿
耿金波萬頃一派天街似水 昨夜辜負無眠意枉費
盡描朱刷翠問天上素娥因甚杳若秦樓嬴女吹倚桂
樹盼廣寒車騎無質霧迷三里元宵夜一鉤殘月仄在
碧雲堆裏 幸值今宵重輪現秦階重履只鄒枚漸老
何日宸游陪侍趣良夜向春城醉醉語如花伎歎光景

好處難圓月也與人無二

怨朱絃

寄菑川畢載積使君

憶水嬉天氣鮮新
蘭葉離離燕子紛紛
賣錫時候韶光
妖冶撩人樂遊原上
平康曲裏舞衫歌扇
如雲更廣陵
水色半是堆藍
半是拖銀樓上珠軒
九曲船上湘簾四
面一樣無塵還爭羨
綠楊低處刺史留賓
正吳娘細
膾紅鱗玉簫作使
綉簾橫陳小史菱花
妖童荷葉宜笑

宜嗔嬌歌一曲美酒千巡忽見夕陽零亂且隨著裊裊
金鞭隱隱香輪早辦兩行燈火留待參差歸騎同入城
闌奈此日依稀記省事已前春

三臺

春景用万俟雅言清明原韻

又紅閨掛殘斜月香塵鏤完微雨整飛蟬一望碧虛前
見皎鏡溶溶南浦風光汎漸蘸垂楊縷三春景如花似
霧鞦韆社淡日濃烟蹴鞠隊繁箏急鼓料鳳城鈿車寶

穀不住紛紛來去喚桂子小玉報花香日煖與隔牆隣
女踏青須結伴東郊路看多少繡簾珠戶喜今日滿
院晴絲怕明朝一庭落絮更杜宇喚取春老榆錢壓將
春暮憶去年元夜玩燈時曾立在火闌珊處轉盼又星
橋燃蠟炬鬧蛾兒紅樓紫府休沾惹竊玉閒愁且安排
尋香公務

拋毬樂

咏美人蹴鞠

聞道凝粧多暇蟬鬢嬌嬈勻面纔了絳額初竟纖纖眉
無蘸畫殼翠羽低飛壘香閣紅襟新乳正好作劇尋歡
小疊魚盞遍約嬉春女向暖日紅樓商量細數氤氲粉
澤喧闐笑筭白打鞦韆和格五總然無意緒且水晶
簾畔斜穿鞠域相邀同去此際綽約輕盈嬌花百朶
瓊枝一樹寶釵鬆羅襪小爭漾絳綃窮袴玉醉花歌吹
亂紅巾幾縷一泓香雪臨風慢舞髮髻似滾瓊閨絮更
香毬將墜最憐小玉多能傍襯凌波微步漸蹴罷春愁

扶髻影嬌喘渾無語小換輕容滿身紅雨

稍遍

咏彈箏

何處放嬌矜羅裙上一寸銷魂地倚桃笙恰恰罷梳頭
正是懨懨天氣上青樓輕攏鬢素乍捱纖筩萬種情如
水正搭定鮫綃粧完義甲十二鈿蟬櫛比對玉荷清影
顫瓊枝又小語流鶯上柳絲慢撚斜搗髮顰衫偏那人
情味似秋夜楚天急雨彈入空舫裏鼓神絃含商嚙

徵盡伶俐拍碎棠梨唱殘紅豆一雙玉剪低還起印粉
痕圓凝愁聲重碧到眉峯無際怪窗前款款落紅輕墜
見十五檀奴綠窗西要竊聽曲中私意不覺閣住銀篆
婉轉籌身世種玉前緣簸錢舊事脈脈縈牽不已家鄉
秦隴幾時歸此曲可憐猶在耳

戚氏

東程邨文友

想當年黃公壚畔興翩翩盤馬雕龍春風門巷盛貂蟬

有鄒陽董相一時賞譽重琅玕畧記旗亭遊處都相似
爾我周旋自許上流人稱名士終朝蹋臂縈牽更兒呼
德祖弟畜灌夫意氣無前憶唱綠幘金丸風流放誕
並坐響鵠絃髣髴是巷名金線幕號紅蓮回中下杜油
壁雕鞍曾經墜粉遺鈿狂奴減未癡人死未詬厲語亦
相憐分攜成舊雨酒闌追省一往淒然同學少年雖
健奈酒徒散盡不堪言道政坊頭延秋門外憶了千千
萬論窺簾映柱人何限都分付碎雨零烟念故人一樣



艱難總蕭瑟江南庾子山寫瑤琴怨我彈未了又怕君彈

鶯啼序

春日遊平山堂卽事

三月雷塘口多少游絲浴鶯正潋灩文穀初平金溝種
滿芳樹屏幕津樓斜蘸水鞦韆春院閒吹絮喜夾衣初
試艇子一雙搖去陣陣鬢絲層層簾影齊問平山渡
隔船紗裊裊亭亭影落淥波深處照菱花水面明粧唱

竹枝風前詩句又東園芍藥纔紅金鈴爭護 蘭橈小
攏看遠徑裙花漾塵微步漸鋪遍璫瑜玉笋飛觥春纖
拂素紅子低敲青梅小摘闌干却立頻回顧驀地見玉
鈎斜下路傷今弔古黯然偷注橫波此處是隋皇墓
幾番怱怱流水東風往事渾無據且趁江流正滑好放
蜻蛉慢搖紈扇重歌金縷暝翠將沉船頭欲轉茱萸灣
子紅橋下妬游童寶馬將人覩可憐此際歸來兩岸榆
錢一天絲雨

十五家詞卷三十五